

ՀԱՅ-ԱՐԱԲԱԿԱՆ ՔԱՂԱՔԱԿԱՆ
ՅԱՐԱԲԵՐՈՒԹԻՒՆՆԵՐԸ ԱՐԱԲԱԿԱՆ
ՓԱՍՏԱԹՂԹԵՐԻ ԼՈՅՍԻ ՏԱԿ
(20րդ դարի սկիզբ)

Դոկտ. Ա. Հ. ԹՕՓԱԼԵԱՆ

1.

Իր դարաւոր պատմութեան ընթացքում Հայ ժողովուրդն ունեցել է քաղաքական, առեւտրական, տնտեսական եւ մշակութային առնչութիւններ շատ ժողովուրդների հետ, այդ թւում նաեւ իր աշխարհագրական միջավայրին պատկանող արաբների հետ:

Հայ-արաբական յարաբերութիւնների պատմութեան ակունքները մեզ տանում են դէպի հեռաւոր անցեալը:

Հայ մատենագրութեան էջերում արաբների, եւ արաբ պատմիչների ու աշխարհագիրների աշխատութիւններում Հայերի եւ Հայաստանի մասին պահպանուած մեծածաւալ նիւթը կենդանի վկան է երկու ժողովուրդների հնադարեան շփումների առկայութեան: Այս պայմանաւորուած է ինչպէս պատմական եւ աշխարհագրական՝ այնպէս էլ քաղաքական հանգամանքներով:

Հայերը եւ արաբները պատկանում են միեւնոյն աշխարհագրական միջավայրին: Եւ ահա, վաղնջական ծանօթութեամբ, նրանց միջեւ հաստատուել են տարաբնոյթ՝ այլ սերտ կապեր:

Երկու ժողովուրդների միջեւ վաղագոյն ժամանակներից ըստեղծուած վերոյիշեալ պատմական կապերի մէջ առանձնայատուկ տեղ են գրաւում քաղաքական յարաբերութիւնները, որոնք ձեւա-

ւորուել են դարերի ընթացքում եւ անցել պատմական տարրեր շրջաններ: Այդ ժամանակաշրջաններից իւրաքանչիւրը բնութագրուել է իր իւրայատուկ դիմադժով եւ գլխաւոր նպատակով:

Հայ-արարական քաղաքական յարաբերութիւնները իրենց առաջին հանգրուանին ունեցել են միջպետական բնոյթ, եւ «պետական մակարդակով քաղաքական յարաբերութիւններ են հաստատուել հայերի ու արաբների միջեւ, որ [ոնք] սկսուել են Տիգրան Մեծից [եւ] հասել մինչեւ Կիլիկիայի թագաւորութեան անկումը»⁽¹⁾: Ժամանակի առումով՝ այս շրջանն ընդգրկեց «մ.թ.ա. 1-ին դարից մինչեւ մ.թ. 14-րդ դարը»⁽²⁾:

Հայ-արարական քաղաքական, ինչպէս նաեւ տնտեսական եւ մշակութային, կապերը զգալիօրէն ուժեղացան եօթներորդ դարում, երբ Բիւզանդական Կայսրութիւնը կրկին մէջտեղ բերեց Հայաստանում քաղկեդոնականութեան տարածման հարցը եւ Հայոց Աշխարհում ստեղծեց քաղաքական լարուած կացութիւն: Իր այդ կեցուածքով՝ Բիւզանդիան զուտ կրօնականից բացի հետապնդում էր նա՛եւ քաղաքական նպատակներ: Այդ ուղիով նա ձգտում էր ապահովել կայսրութեան քաղաքական դիրքերը Հայաստանում եւ թոյլ չտալ օրըստօրէ հօգրացող Արաբական Խալիֆայութեան քաղաքական ազդեցութեանը տարածման Հայկական Լեռնաշխարհում:

Այդ ժամանակաշրջանին Հայաստանում նշմարուեց առկայութիւնը հասարակական եւ քաղաքական երկու հոսանքների: Այն պարզորոշ կերպով արտայայտուեց 648-ին Դուինում հրաւիրուած եկեղեցական յատուկ ժողովում, ուր քննութեան դրուած էր Բիւզանդական Դաւանանքի ընդունման հարցը: Ժողովին մասնակցում էին աշխարհիկ եւ հոգեւորական բարձրաստիճան ներկայացուցիչներ: Աշխարհիկ մասնակիցներին գլխաւորում էր եօթներորդ դարի նշանաւոր զօրավար եւ քաղաքական գործիչ Թէոդորոս Ռշտունին, որը դէմ էր քաղկեդոնական դաւանանքի ընդունման առաջարկութեանը: Դուինի վերոյիշեալ ժողովում յաղթանակ տարան Թէոդորոս Ռշտունին եւ իր կողմնակիցները⁽³⁾:

Հայ-բիւզանդական քաղաքական յարաբերութիւնների այսպիսի լարուած մթնոլորտում Հայոց համար ցանկալի էր եւ ձեռնառու արագ կերպով բանակցութիւնների մէջ մտնել հօգրացող Արաբական Խալիֆայութեան հետ:

Եւ ահա՝ Հայ-արարական քաղաքական մերձեցման առաջին քայլերը, որոնք ձեռնարկուեցին 648 թուականից սկսեալ՝ պաշտօնական տեսք ստացան 652 թուականի Հայ-արարական յատուկ պայմանագրով: Քաղաքական եւ զինուորական բնոյթի այս առաջին պայմանագիրը բովանդակում էր հետեւեալ հիմնական կէտերը.

«1. Հայաստանը թօթափում էր բիզանդական տիրապետութիւնը եւ ընդունում Արարական Խալիֆայութեան հովանաւորութիւնը:

«2. Հայաստանը երեք տարի ազատում էր Խալիֆայութեան նկատմամբ հարկային որեւէ պարտաւորութիւն կատարելուց, իսկ սահմանուած ժամկէտն անցնելուց յետոյ, հայերը պէտք է [որ] վճարէին արքունի հարկ եւ «սակը», որի չափն ու քանակը որոշուելու էին հայերի հայեցողութեամբ:

«3. Արարական Խալիֆայութեան համաձայնութեամբ եւ թոյլտրութեամբ, հայերը կարող էին ունենալ 15,000-անոց հեծելազօր...»:

«4. Այնուհետեւ, օտարերկրեայ յարձակումների դէպքում, Արարական Խալիֆայութիւնը պարտաւորում էր Հայաստան ուղարկել այնքան զօրք՝ որքան կը պահանջուէր հայերի կողմից:

«5. Պայմանագրով Խալիֆայութիւնը խոստանում էր չմիջամտել Հայաստանի ներքին գործերին, եւ որպէս զրա լաւագոյն երաշխիք՝ յատուկ կէտով պարտաւորութիւն էր ստանձնում ոչ միայն զօրք չմտցնել Հայաստան՝ այլեւ երկրի բերդերում շտեղաւորել ոչ մի պաշտօնեայ, արարական սպայ կամ թէկուզ մէկ հեծեալ զինուոր»⁽⁴⁾:

Վերոյիշեալ պայմանագրով սկսուած Հայ-արարական քաղաքական մերձեցումը այդ հանգրուանին ունեցաւ կարեւոր նշանակութիւն Հայաստանի համար, այսինքն՝ առժամանակ ապահովեց անոր անվտանգութիւնը արարական ասպատակութիւնից, իսկ միւս կողմից՝ հայ ազնուականները եւ նախարարները պահպանելով իրենց սեփականատիրական, ժառանգական եւ այլ կարգի արտօնութիւնները՝ զրանով իսկ մասամբ ապահովեցին Հայաստան Աշխարհի ներքին ինքնավարութիւնը:

Հայ-արարական փոխյարաբերութիւնները շարունակուեցին արաբների կողմից Հայաստանի նուաճումից յետոյ ալ: Մօտ երկու դար Հայաստանը գտնուելով Արարական Խալիֆայութեան կազմում՝ գործուն մասնակցութիւն ունեցաւ Խալիֆայութեան տնտեսութեան աշխուժացման եւ քաղաքական յարաբերութիւնների զարգացման մարզերում:

2.

Տասնվեցէն տասնեօթներորդ դարերի ընթացքում արդէն հիմք է դրւում հայ-արարական քաղաքական առնչութիւնների պատմական երկրորդ շրջանին, որ զոյատեւեց մինչեւ Առաջին Աշխարհամարտի աւարտը եւ Օսմանեան Կայսրութեան վախճանը: Մինչ այդ կործան-

ուած էին Արարական Սայրիֆայութիւնը եւ Կիլիկիայի Հայկական Քաղաքութիւնը, եւ Հայ եւ արաբ ժողովուրդներին վիճակուած էր քաղաքական նոյն ճակատագիրը: Թէ՛ Հայերի եւ թէ՛ ալ արաբների Համար միճաւանջային շրջան էր: Նրանք ընկած էին օսմանական լծի տակ: Այս պայմանների մէջ արաբները եւ Հայերը իրենց քաղաքական յարաբերութիւնները իրագործում էին «որպէս իրենց պետականութիւնը կորցրած եւ միեւնոյն բռնակալական՝ օսմանեան լծին ենթակայ երկու ժողովուրդներ»⁽⁵⁾:

Ահա ա՛յս էլ Հանդիսացաւ Հայ-արաբական քաղաքական յարաբերութիւնների այս շրջանի իւրայատկութիւնը:

Պատմական այս Հանգրուանին, երբ Հայ եւ արաբ ժողովուրդների ճակատագրերը քաղաքական առումով սերտօրէն խաչաձեւում էին իրար՝ աւելի արդիւնաւէտ բնոյթ ստացան Հայ-արաբական քաղաքական կապերը: Ու ծնուեց կարեւոր մի ճշմարտութիւն, այն՝ որ գոյութիւն ունի մի ընդհանրութիւն արաբ եւ Հայ ժողովուրդների քաղաքական շահերի միջեւ: Եւ օսմանեան բռնատիրական լծից ազատագրուելու զազափարը հետզհետէ դարձաւ երկու ժողովուրդների քաղաքական հիմնական նպատակը, եւ հիմք Հանդիսացաւ քաղաքական յարաբերութիւնների զարգացմանը նրանց միջեւ:

Ահա ազգային ու քաղաքական այս ընդհանուր նպատակը մղեց Հայ եւ արաբ ժողովուրդներին միաւորել իրենց ջանքերը եւ միմիանց նեցուկ դառնալ օսմանեան բռնատիրութիւնից ազատագրուելու Համար մղուող պայքարում:

Այս առումով յիշատակութեան արժանի է Արարական Հայրենիքի Լիկայի գլխաւոր կոմիտէի 1905-ին հրատարակած եւ «Արարական երկրները արաբներին» վերնագրուած կոչը, որ ուղղուած էր «Եւրոպայի [եւ] Հիւսիսային Ամերիկայի քաղաքակիրթ, լուսաւորեալ եւ մարդասէր ազգերին», եւ ուր նշուած էր թէ «Թուրքիան զրուներում է խաղաղ ճանապարհով տեղի ունենալիք մեծ փոփոխութեան նախօրէին: Արաբները, որոնց թուրքերը բռնանում էին նրանց երկպառակելով կրօնադաւանական աննշան հարցերում, դիտակցել են իրենց ազգային, պատմական եւ ազգագրական միատարրութիւնը եւ ցանկանում են անջատուել Օսմանի փտած ծառից՝ միաւորուելու մի անկախ պետութեան մէջ:

«... Թուրքիայից մեր անջատման փաստի շնորհիւ, ճնշուած բոլոր ազգերը՝ քրտերը, Հայերը, ալպանացիները եւ այլն եւ այլն իրենց ազատութիւնը պիտի ձեռք բերեն, քանի որ արաբների միջոցով է, որ սանձահարում են ալպանացիներին, եւ ալպանացիների ձեռքով է որ ճգմում են պուլղարներին: Դարձեալ արաբների ձեռքով է որ նրանք ճնշում են քրտերին եւ քրտերի ձեռքով է որ ջարդում են Հա-

յերին: Հետեւաբար՝ հենց որ մենք լքենք Սուլթանին⁽⁶⁾՝ ամէն մի ազգ պիտի իր անկախութիւնը հռչակի եւ աշխարհը պիտի փրկուի երկպառակութեան այն աղբիւրից՝ որ Արեւելեան Հարց է կոչուում⁽⁷⁾:

Հայ-արարական յարաբերութիւնները մեկնող ուշագրաւ փաստաթուղթ է արարական քաղաքական յայտնի գործիչ Նեմիպ Ազուրիի 15 Ապրիլ 1905 թուակիր նամակը, որ առաքուեցաւ հայ հասարակական գործիչ եւ Լ'Արմենի թերթի հրատարակիչ եւ խմբագիր Մինաս Չերազին⁽⁸⁾: Նամակում Ազուրին գրում է.

«Սիրելի հրատարակիչ,

«Զեզ եւ Զեր գնահատելի թերթի հետ կապ հաստատելու հաճելի պարտականութիւնը ստանալով՝ ես ապաւինում եմ Զեր համակրանքին, յոյս ունենալով, որ օգնելու էք ինձ՝ տեղադրելով Զեր թերթում այս մի քանի տողը, որով ցանկանում եմ հրապարակօրէն արտայայտել իմ շնորհակալութիւնը Զեր եւ Զեր աշխատակիցներին այն խանդավառութեան համար, որով դիմաւորեցիք արարների հայրենիքի դարթօնքը եւ այն վեհանձն կամպանիայի (արշաւի) համար, որ բարեհաճել էք ձեռնարկել ի նպաստ մեր ազգային շարժման:

«Նոյն շնորհակալութիւնը յղում եմ Զեր բոլոր հայրենակիցներին, որոնք, հիմք ունեւ կարծելու, նոյն զգացմունքն ու համակրանքն ունեն մեր հանդէպ»⁽⁹⁾:

Շարունակելով իր նամակը Ազուրին դեռ շեշտում է հայ եւ արար ժողովուրդների ընդհանուր շահերի առկայութեան եւ հայերի ունեցած արժանիքի հանգամանքները: «Քաջաբար առաջարկելով ամբողջ ուժով օժանդակելու արարներին Թուրքական Պետութեան դէմ՝ միւս կուսակցութիւններից առաջ, հայերը մի անգամ եւս ցոյց տրուեցին, որ գիտակցում են մեր ընդհանուր շահերը: Նրանք նոյնպէս ցոյց տուեցին իրենց արժանիքը միւս ազգութիւնների համեմատ, որոնք Օսմանեան Կայսրութիւն կոչուած այդ անհետեւողական կառավարման ճնշման տակ են գտնուում դեռ:

«Այս արժանիքը դեռեւս բաւականին ճանաչուած չէ: Իմ կարծիքով այդ արժանիքը կայանում է նրանում, որ հայերը չեն վախեցել տասը տարի առաջ⁽¹⁰⁾ արթնացնելու իրենց ազգային զգացմունքը ասիական ժողովուրդների մէջ Թուրքիա-չերքէզական բռնակալութեան դէմ, այնպէս՝ ինչպէս յոյները 19-րդ դարի սկզբում համարձակութիւն ունեցան ազդանշան տալ պալքանեան ժողովուրդներին ազատագրուելու քմահաճ փատիշահների դաժան բռնակալութիւնից: Եւ թուրքերը երբեք չեն կարող ջարդերի մէջ խեղդել հայերի օրինական ձգտումները, [այնպէս՝] ինչպէս [որ] Եւրոպայի, Ասիայի եւ Աֆրիկայի միացեալ ուժերը չկարողացան խեղդել Յունական

Ապստամբութիւնը, որի բարիքները տարածուեցին ամբողջ Պալքան-
ների վրայ: Հայ հերոսների արիւնով թրջուած հողից բարձրացել են
երկու մեծ հսկաներ՝ քրդերի հայրենիքը եւ արաբների հայրենիքը,
որոնք հիմա բարձրացնում են իրենց ծանր մահակները՝ իջեցնելու
համար բռնակալի գլխին»⁽¹¹⁾:

Նամակի մէջ ուշագրաւ արաբ գործիչների եզրայանդումն է,
որը բնորոշ է արաբների զարթօնքի ժամանակաշրջանի արաբ ազգային
քաղաքական գործիչներին: «Հետեւաբար», եզրակացնում է Ազու-
րին, «պէտք է ճանաչենք եւ հասկանանք իրար, եւ պէտք է միանանք
յարձակուելու համար ընդհանուր թշնամու դէմ, որը այնքան շատ
օգտուեց մինչեւ հիմա մեր անհամաձայնութիւնից մեզ առանձին-
առանձին ջախջախելու համար: Նա Ալպանիայի, Մակեդոնիայի, Հա-
յաստանի, Հաուրանի, Նեճաի, Եմենի եւ Հիճազի յեղափոխական
տարբեր ուժեր մէկը միւսին դէմ կանգնեցրեց: Այսպիսով՝ ոչ մի ազգ
Թուրքիայում չի ցանկանում այլեւս ստրուկ լինել, քանի որ բոլորն
էլ ապստամբուել են մէկը միւսի յետեւից: Իրար չհասկանալն է նրանց
պահում ատելի լծի տակ: Բայց այսօր արաբական բոլոր նահանգները
միացած են նոյն հայրենասիրական զգացմունքով, մէկ զեկազարու-
թեան տակ: Հայերը արդէն միացել են մեզ հետ: Ուրիշ խմբաւորում-
ները նոյնպէս միանում են մեզ եւ աղատագրութեան օրը այնքան հե-
ռու չէ՝ որքան կարող են կարծել»⁽¹²⁾:

Տրուած այս հատուածներում հիանալի կերպով արտայայ-
տուած են արաբ եւ հայ ժողովուրդներու քաղաքական շահերի ընդ-
հանրութիւնը եւ նրանց միասնաբար հանդէս դալու անհրաժեշտու-
թիւնը:

Քսաներորդ դարի սկիզբին հայ-արաբական յարաբերութիւն-
ների զարգացման մասին է վկայում 18-23 Յունիս 1913-ին Երիտա-
սարգ Արաբների կազմակերպութեամբ Փարիզում հրաւիրուած Ա-
րաբական Քոնկրէի որոշումները⁽¹³⁾:

Քոնկրէին մասնակցել են էլ-լէ-մերքեզիէի, Պէյրութի Բարե-
նորոգումների Լիկայի եւ Ամերիկայում գործող Արաբական Հայրե-
նակցական Միութեան 24 պատգամաւորները եւ 200 հիւրեր: Քոնկ-
րէն «չափազանց անհրաժեշտ» է նկատել «էական բարենորոգումները
Օսմանեան Կայսրութեան համար», եւ որ «նրանք պէտք է իրագոր-
ծուեն արագ կերպով»⁽¹⁴⁾: Նոյն ատեն՝ մասնաւոր կէտով մը Քոնկ-
րէն իր ղիրբորոշումը արտայայտեց հայ ժողովուրդի ազգային ար-
դար պահանջների նկատմամբ, եւ շեշտեց, որ «Տ. Քոնկրէսը հաւա-
նութիւն է տալիս եւ իր համակրանքն է արտայայտում Թուրքիայի

Հայերի պահանջներին, որոնք հիմնուած են ապակենդրոնացման սկզբունքների վրայ եւ նրանց պատուիրակի միջոցով ողջուն է յղում նրանց...»⁽¹⁵⁾։

Արար եւ Հայ ժողովուրդների ազգային շահերի ընդհանրութեան գաղափարը, որ յստակօրէն գծուած ենք գտնում քսաներորդ դարակիրներին՝ դարձաւ առանցքը Հայ-արարական քաղաքական յարաբերութիւնների։ Փաստական նիւթի ուսումնասիրութիւնը մեզ յանգեցնում է այն հետեւութեան, որ համանման մղձաւանջային իրազրութեան մէջ Հայերը եւ արարները հանդէս եկան որպէս բնական դաշնակիցներ՝ մեկնակէտ ունենալով իրենց ազգային շահերի ընդհանրութեան գաղափարը։ Ահա այս հանգամանքն էր որ այս հանգրուանին մեծ դեղ խաղաց Հայ-արարական քաղաքական յարաբերութիւնների ամրապնդմանը եւ անոնց յետագայ զարգացմանը մէջ։ «Այս հանգրուանին», գրում է արար յայտնի մտաւորական Դոկտ. Հրակէն Ալի Եթիմը, «Հայոց աշխոյժ օժանդակութիւնն ու մասնակցութիւնը անցողիկ պարագայ մը չէր միայն, այլ՝ պայքարային մասնակցութիւն մը հասարակաց եւ դառն ազդակներու հանդէպ, որոնցմէ տառապեցան արար եւ Հայ ժողովուրդները»⁽¹⁶⁾։

3.

Հայ եւ արար ժողովուրդները մեծագոյն ողբերգութիւնն ապրեցին Առաջին Աշխարհամարտի տարիներին։ Օգտուելով պատերազմի ընձեռած հնարաւորութիւնից՝ Երիտասարդ-Քուրքերի կառավարութեան ղեկավարները «որոշեցին որ հասել է յարմար պահը վերջ տալու երկու ուժեղ ազգային շարժումներին՝ արարական ազգայնականների շարժմանը Սիրիայում, Իրազում եւ Հիճազում, եւ Հայկական շարժմանը՝ Արեւելեան Անատոլիայում»⁽¹⁷⁾։

Հայկական եւ արարական հարցերը լուծելու համար Երիտասարդ-Քուրքերը զիմեցին ռազմական ուժի եւ որդեգրեցին բնակչութեան զանգուածային տեղահանման եւ բնաջնջման քաղաքականութիւնը։ 1915-ի Ապրիլին նրանք սկսեցին կենսազորձել Հայ ժողովուրդի ամբողջական ոչնչացման ոճրապարտ ծրագիրը։ Մօտ մէկուկէս միլիոն Հայ ոչնչացնելով՝ Երիտասարդ-Քուրք ոճրագործները արարական անապատները քշեցին մնացած Հայ բնակչութեանը։ Իսկ արար ասպնջական ժողովուրդը լայն բացեց իր գիրկը հարիւր հազարաւոր Հայ գաղթականների առջեւ եւ նեցուկ եղաւ նրանց։

Մահուան ճիրաններից փրկուած Հայ տարագիրները ապաստան գտան Սիրիայում, Լիբանանում, Յորդանանում, Եգիպտոսում եւ արարական այլ երկրներում։

Հաստատուելով այդ երկրներում՝ հայ ժողովուրդը սերտ յարաբերութիւններ հաստատեց արաբ ժողովուրդի հետ:

Լաւապէս ըմբռնելով որ արաբ ժողովուրդը պատրաստ է ապստամբութեամբ թուրքիայից անջատուել եւ նուաճել իր անկախութիւնը՝ թուրք ոճրագործները որոշեցին նոյնը իրագործել արաբական երկրներում, եւ 1916-ի գարնանը նրանք փորձեցին հաշուեյարդար տեսնել արաբների հետ: «1916 թ. գարնանը Դամասկոսի եւ Պէյրութի հրապարակները ծածկուեցին կախաղաններով: Մահապատիժի ենթարկուեց մօտ 800 մարդ՝ արաբական ազատագրական շարժման գործիչներից»⁽¹⁸⁾: Արաբ բնակչութիւնը ենթարկուեցաւ նաեւ բռնի տեղահանման: «Ճեմալ Փաշայի կարգադրութեամբ տասնեակ հազարաւոր արաբներ իրենց բնտանիքներով բռնի քշուեցին անապատում ստեղծուած համակենտրոնացման ճամբարները»⁽¹⁹⁾: Հայերը եւ արաբները դարձեալ զոհը դարձան միեւնոյն քաղաքականութեան: Մական հակառակ իր դէմ գործադրուած ահաւոր ցեղասպանութեան՝ արաբական երկրներում եւ ընդհանրապէս ամէնուրեք վերապրող հայ ժողովուրդը հետապնդեց իր ազատագրութեան նուիրական դատը: Իսկ արաբ ժողովուրդը շհրաժարուեց ապստամբութեան դրօշ բարձրացնելէ՝ վերջնականապէս ազատագրուելու համար թուրքիայի տիրապետութիւնից:

Հայ-արաբական փոխյարաբերութիւնների այս հանգրուանը յատկանշուեց զինական համագործակցութեամբը հայ եւ արաբ ժողովուրդների: Գործնական գետնի վրայ այն իր արտայայտութիւնը գտաւ Արեւելեան Լէգէոն անունով զինուորական խումբի ստեղծման մէջ, որը բաղկացած էր հայերից եւ սուրիացիներից⁽²⁰⁾: Խումբը ձեւաւորուեց կամաւորական սկզբունքով: Հայ կամաւորների թիւը կազմեց 3000⁽²¹⁾:

Արեւելեան Լէգէոնի ստեղծման որոշումը ընդունուեց Ֆրանսիայի Արտաքին Գործոց Նախարարութեան եւ Հայ Ազգային Պատուիրակութեան միջեւ 1916-ի Նոյեմբեր 26-ին գոյացած համաձայնութեան հիման վրայ⁽²²⁾: Համաձայնութեան մէջ շեշտուած էր, որ «Ֆրանսական կառավարութիւնը որոշած է զրապէս քաջալերել հայ եւ սուրիացի ժողովուրդների «թուրքին դէմ պայքարելու բաղձանքները»⁽²³⁾: Լէգէոնը պիտի մասնակցէր «Ասիական թուրքիոյ մէջ տեղի ունենալիք գործողութեանց եւ պիտի զրուի Սուրիոյ Նաւային Զօրարաժիւնը գլխաւորող Մովակալի բարձր հրամանատարութեան ներքեւ»⁽²⁴⁾:

Լէգէոնի ընդհանուր հրամանատար նշանակուեցաւ Ֆրանսիական բանակի գնդապետ Թոմիոն⁽²⁵⁾:

Առաջին Համաշխարհային Պատերազմի աւարտման շրջանին Արեւելեան Լէզէոնը մասնակցեց օսմանեան լծից արար ժողովուրդի ազատագրման համար մղուած պայքարին:

1918 Սեպտեմբեր 19-ին, երբ անգլիական բանակը Պաղեստինում յարձակման անցաւ Ռաֆաթի⁽²⁶⁾ եւ Արարայի շրջաններում՝ «Արեւելեան Լէզէոնը ռազմական դիրքեր գրաւեց Արարա սարի մօտ՝ Նապուսից հարաւ»⁽²⁷⁾: Հայ եւ արաբ ռազմիկները դիմադրեցին թուրքերին եւ ի վերջոյ ստիպեցին նրանց փախուստի դիմել: Խօսելով Արարայի մօտ Արեւելեան Լէզէոնի մարտական գործողութիւնների մասին՝ գնդապետ Ռոմիոն շեշտեց հետեւեալը, թէ «աւելի քան տասներկու ժամուան ընթացքին վաշտին սքանչելի կեցուածքը, հակառակ իր կորուստներուն, կարելի ընծայեց իրականացումը թշնամին կասեցնելու իր առաքելութիւնը, որով կոուին շարունակութիւնը վաշտին կողմէ աւելորդ եղաւ»⁽²⁸⁾: Աւելի՛ն «մենք հպարտ մխիթարութիւնն ունինք հողին յանձնելու հայ հերոսները, բոլորն ալ առաջին դծին վրայ ինկած, իրենց երեսը դէպի թշնամին, օրինակ հանդիսանալով: Անոնք բոլորն ալ արժանի են Պատերազմական Խաչի (Croix de Guerre), ամէնքն ալ պաշտպան սուրբերն են Արեւելեան Լէզէոնին»⁽²⁹⁾:

Այս փաստը ուշագրաւ է այն առումով, որ տուեալ հանգրուանին հայը կարողացաւ ցուցաբերել քաղաքական ճկուն իմաստութիւն եւ նեցուկ հանդիսացաւ արաբ ժողովուրդի ազգային արդարացի պայքարին: Հայը որպէս զինուոր արեան իր մկրտութիւնն ստացաւ արաբական հողի վրայ արաբ զինուորի կողքին, իրականութիւն մը, որ ծառայեց Հայ-արաբական քաղաքական համագործակցութեան ամրապնդման:

Հայ-արաբական յարաբերութիւնները սերտացման շրջան ապրեցին, երբ թօթափելով օսմանեան տիրապետութիւնը՝ արաբական երկրները պայքար ծաւալեցին իրենց ազգային, անկախ եւ ինքնուրոյն պետութեան ստեղծման համար:

Այս առնչութեամբ հետաքրքրական է Սիրիայի արաբ ժողովուրդի պայքարը իր ազգային պետութեան ստեղծման համար, որի դէմ, այդ հանգրուանին, հանդէս եկաւ Ֆրանսիան:

Սիրիացի արաբ ժողովուրդի պայքարի ղեկավարութիւնը ըստանձնեց էմիր Ֆէյսալը, որ 9 Մայիս 1919-ին ուղերձով դիմեց Դամասկոսի քաղաքապետարանում հաւաքուած ինչպէս Սիրիայի՝ այդպէս էլ Պաղեստինի, Յորդանանի եւ Լիբանանի ազգային առաջնորդներին, թէ հաւանութիւն տալի՞ս են նրա դիրքորոշմանը եւ քաղաքականութեանը»⁽³⁰⁾: Ներկաները տուին զրական միաձայն պատասխան:

Ի պատասխան էմիր Ֆէյսալի հարցադրման՝ ելոյթ ունեցաւ նաեւ Սիրիայում տեղաւորուած Հայ գաղթականների հոգեւոր առաջնորդը, որ ներկայ էր հաւաքին: Պաշտպանելով սիրիացիների ազգային անկախութեան համար մղած պայքարը՝ նա միաժամանակ շընորհակալութիւն յայտնեց արաբներին՝ վերջին չորս տարուան ընթացքում Հայ գաղթականների նկատմամբ նրանց լաւ վերաբերմունքի համար եւ եզրակացուց, թէ «Հայերի պատմութեան մէջ արաբների անունը կը գրուի ոսկէ տառերով»⁽³¹⁾:

Պատուիրակները լսելուց յետոյ՝ էմիր Ֆէյսալը շարունակեց իր ճառը, եւ կանգ առաւ երկրի կառավարման ձեւի վրայ: «Ես կարծում եմ, որ աւելի շատ ուշադրութիւն է դարձուելու փոքրամասնութիւնների իրաւունքներին, որպէսզի սրանով վերացուեն ատելութիւնը եւ կրօնական թշնամանքը, զորս ստեղծել էին թուրքերը, եւ դրանց փոխարէն ցանել սիրոյ եւ եղբայրութեան սերմեր տարբեր կրօնի պատկանող մարդկանց միջեւ»⁽³²⁾:

Ըմբռնելով արաբ ասպնջական ժողովուրդի մարդասիրական դիրքորոշումը իր հանդէպ՝ թրքական գեհէնից ճողոպրած եւ արաբական երկրներում ապաստան գտած տարազիր Հայութիւնը առանց վարանելու պաշտպան կանգնեց եւ մասնակցեց նրա ազգային անկախութեան համար մղած պայքարին:

Քաղաքական այս կեցուածքով՝ Հայերը ապացոյցը տուին գերագոյն զոհողութեան:

Այսպիսով Հայ եւ արաբ ժողովուրդները ցուցաբերելով քաղաքական խոր իմաստութիւն՝ քսաներորդ դարի առաջին երկու տասնամեակներին կարողացան հիմնել արիւնով նուիրագործուած քաղաքական սերտ յարաբերութիւններ, որոնք իրենց զարգացման վերելքը ունեցան նաեւ յետագայ տասնամեակներին եւ շարունակուում են ցայսօր: Հայ եւ արաբ ժողովուրդների միջեւ առկայ եւ դարերից եկող պատմական եւ քաղաքական կապերը եւ միացեալ դիրքորոշումները հական եւ ճակատագրական հարցերի նկատմամբ այսօր հաստատում են կարեւորութիւնը երկու ժողովուրդների միջեւ քաղաքական, տնտեսական եւ մշակութային փոխյարաբերութիւնները էլ աւելի զարգացնելու եւ խորացնելու անհրաժեշտութեան:

Ա. Թ.

ԾԱՆՕԹԱԳՐՈՒԹԻՒՆՆԵՐ

1. Ն. Յովհաննիսյան, «Հայ-արաբական բաղադրական համագործակցության պատմությունից», Արարատ, Պէյրուք, 14 Յունիս 1989:
2. Նոյն:
3. Այս մասին տես՝ Վազգէն Յակոբյան, *Կանոնադիրք Հայոց*, հտ. Բ., Երևան 1971, էջ LXXII-LXXIII, իսկ այս առիթով ընդունուած կանոնագրին համար տես՝ նոյն, էջ 200-215:
4. Ս. Տ. Մելիք-Բախշեան, *Հայաստանը 7-9-րդ դարերում*, Երևան, 1968, էջ 69-70:
5. Յովհաննիսյան, *Արարատ*, 14 Յունիս 1989:
6. Կ'ակնարկուի Սուլթան Ապտուլ Համիտ Բ.-ին:
7. Eugene Jung, *Les Puissances devant la Révolte Arabe: La Crise mondiale de demain*, Paris, 1906, p. 22-24. տես նաև «Արաբական միջաբն փաստաթղթեր արաբաբնական յարաբնութիւնների վերաբնբայ», Հ. Ս. Սարգսնան և Ա. Հ. Թոփայնան [բրգմ.], *Մերձաւոր և Միջին Արեւելքի Երկրներ և Ժողովուրդներ*, հտ. VI, *Արաբական Երկրներ*, Երևան, 1974, էջ 217-218: Ասկէ նախ կր նշուի որպէս *Փաստաթղթեր*:
8. Երուսաղէմի կառավարիչի օգնական և *Արաբ Ժողովուրդի Զարեանքը Ասիական Թուրքիայում* գրքի հեղինակ Նեհիպ Ազուրիի նամակին համար տես *Փաստաթղթեր*, էջ 219-220, և *L'Arménie*, Paris, 15 Avril 1905:
9. *Փաստաթղթեր*, էջ 219:
10. Կ'ակնարկուի Պոլսոյ 1895-ի դէպքերուն և պատուխամիտնան բռնատիրական շրջանին:
11. Տես՝ *Փաստաթղթեր*, էջ 219-220, տես նաև *L'Arménie*, Paris, 15 Avril 1905:
12. *Փաստաթղթեր*, էջ 220:
13. Փարիզի Արաբական Բռնկրէի մասին ընդհանրապէս տես՝ *Փաստաթղթեր*, էջ 222, և *— احسان مندي. كفاح الشعب العربي السوري. ١٩٢٨ - ١٩٤٨. دمشق. ١٩٦٢. ص. ٢٠٢ - ٢٠١.*
14. *Փաստաթղթեր*, էջ 222:
15. Նոյն, էջ 222-223:
16. *Զարեանք*, Պէյրուք, 14 Յունիս 1989:
17. Էմին Սաիտ, *Բաներորդ Դարու Արաբական Յեղափոխութիւնները*, Մոսկուա, 1964, էջ 79 (նուսբրէն բարգմանութիւն՝ *— أمين سعيد. ثورات العرب في القرن العشرين*)
18. Ն. Յ. Յովհաննիսյան և Հ. Ս. Սարգսնան, *Միջին Անկախութեան Համար Մղուած Պայքարում*, Երևան, 1975, էջ 22:
19. Նոյն:
20. Տ. Յ. Պոյաննան, *Հայկական Լեզէոնը* (պատմական յուշագրութիւն), Ուոքըր-բաուս, 1965, էջ 9: Արեւելիան Լեզէոնի ստեղծման և կազմակերպման մասին տես՝ Arthur Beylerian, *Les Grandes Puissances, L'Empire Ottoman et les Arméniens dans les Archives Françaises*, (1914-1918), Paris, 1983, p. 278-283:
21. Պոյաննան, էջ XXII:
22. Նոյն, էջ 15-16:
23. Նոյն, էջ 9:
24. Նոյն, էջ 10:
25. Նոյն, էջ 21:

26. Ֆրանսական պաշտոնական աղբիւրներ գայն կը նանչնան որպէս Րաֆահ. տես՝
Beylerian, p. 92 եւ 672:
27. Յովհաննիսեան եւ Սարգսեան, էջ 32:
28. Պոլսեան, էջ 129:
29. Եռյն:
30. Այս մասին տես՝ Great Britain, Foreign Office, *Documents on British Foreign Policy*,
1919-1939, vol. IV, London, 1952, pp. 267-272: Տես նաեւ՝ *Փաստաթղթեր*, էջ
229-230:
31. *Documents*, p. 272:
32. *Փաստաթղթեր*, էջ 230:

ARAB-ARMENIAN POLITICAL RELATIONS ACCORDING TO SOME ARAB DOCUMENTS (Early XX Century)

(Summary)

Dr. A. H. TOPALIAN

Making use of Arab, Armenian and foreign diplomatic documents the author of the article examines the roots of the Arab-Armenian political relations in the early twentieth century, though, as a background, Dr. Topalian sheds some light on these relations both in the antiquity and in the early Middle Ages. The author asserts that the main concern of these relations was but the liberation of the two peoples' respective homelands from the Ottoman domination and yoke, a purpose towards the fulfillment of which the Arabs and the Armenians did not decline of shedding blood and sacrificing their lives for each others' political aspirations.